

精選中外時務文編

精選中外時務文編卷十七

利源

華侍御輝請講求務本至計以開利源摺

奏為歲入不敷民貧財匱請講求務本至計以開利源恭摺具陳仰祈 聖鑒事竊自各國通商以來每歲出洋之銀為數甚鉅近更通行內地小民生計日益艱難而戶部出款歲增數千餘萬內外臣工紛紛建議皆曰清通賦也核釐金也加捐稅也皆取財之法也天下之財止有此數取之過度民力不足以供之則亂端起矣有變而為節財之說者則曰裁額兵也除中飽也汰浮費也有變而為通財之說者則曰興工作也振商務也修鐵路也設銀行也此二說者固較甚矣而原本則不在是夫國用何出出於民民財何出出於地地利何出出於物工作之成成以此也商物之通通以此也輪舟鐵路之運運以此也故董勸農桑講求物產為古聖王生財之道即今日養民致富之真源也民力有所不足必須官為補助者可分為二大端一曰廣種植一曰興水利謹繕祈為我 皇上陳之自兵燹以來各省樹木芟伐殆盡地之硠者忽瘠民之富者忽貧蓋果品材木足以供生人之食用者其利視五穀為尤豐所謂一年之計樹穀十年之計樹木也乃上下因循不知栽培愛護往往山童壤赤一望荒涼小民亦菜色流離無復承平景象則官吏之玩視民瘼也亦已久矣夫種植之大利其在南方者二曰桑曰茶黃河以南之省分近水者無不宜桑近山者無不宜茶苟能由官籌款購買桑秧茶子散給民間並講求養蚕治茗之方不數年而風行各省矣其在北方者二曰葡萄曰棉花黃河以北之省分天寒而地燥惟此為宜葡萄可以釀酒棉花可以紡線織布苟能博求良法勸導民間則餘利豐盈偶有水旱偏災無虞凍餒矣此四事者辦有

成效立可行銷外洋自收權利然地方官吏必將畏難苟安諉於立性之不宜也民情之不願也天下無論何土必有相宜之樹無論何樹必有可收之利此則南北各省皆有之皆宜之無所容其欺飾者也今請定一勸民種植之法民間能於舊有樹木外種樹至五萬株十萬株以上者官為酌給獎賞聊以示鼓勵並請定一戕害樹木之禁有無故戕害樹木一株者貧民罰種兩株富民罰錢千文以充公用中國膏腴既廣寒暑適平他日百產餘盈闕一分利源即增一分稅課天下尚憂貧乏哉此生財之道在廣種植者一也中國水利惟江南各省最為講求自髮捻構亂以來舊日河渠亦多湮塞民既無力修復官亦置若罔聞至於山僻省分及北方高燥中原寥廓之區則地方各官直不知水利為何事惟日持三尺法以催比征徭而已甘肅陝西等省田地尤多荒廢水利之不修河患所由日亟也興修水利古今中外良法頗多約而舉之厥有八事一曰引泉兩山之間必有河建堰引泉咸資利賴然一人之力不能成須量以官紳乃可集費鳩工肇興大利此為牧令者於境內泉源必應確知其數而詳求其用也二曰築塘泉源之大者開泉以引之其細者必築塘以蓄之可購山間高地築塘修開派公紳耆導司啟閉需水者稍納公費為賄地修塘建開之資所銷民財民用耳三曰開渠無論江河漢澗相度高下于其上流開渠以引之必須試澮距川有經有緯旱收其利雨水不為災方為盡善四曰通潮沿海之區鹹地為多日炙雨淋鹹去則草木繁昌遂成沃壤此等海濱漲地廣壤無根棄之則可惜亟宜招民墾闢廣開港汊通引海潮數月之間即可種植興地利養閭民增稅額一舉而數善備焉五曰開井丁寶楨為山東巡撫教民開井汲泉以資灌溉民食其利今外洋開井機器每付僅數百金價值一省購數機則高地居民永免旱燥之患惟開井必擇有樹之地庶用力少而成功多六曰蓄水北方溪澗無多亦有雨水南方能如蓄水北方

不知蓄水誠使低窪之地深濬為湖掘出之土培地種樹湖寬至十丈水深至五尺以上一時日光不能
消燦可積至兩月不乾七曰用車抬棒汲水之法工拙而事勞惟南方之龍骨車可汲水至十餘丈苟購
置多付雇費熟手分教北人事半功倍即可汲河水以溉田西人柳條各車近今水法益加修備並宜擇
善而從以興水利而減水患八曰填石西人近傳新法每四十畝四圍掘一深溝寬一二尺深三四尺填
以碎石高出地面石能吸水雨潦則泥濘皆乾石能蓄水久旱亦土膏脈潤亦西法可採之一端也斯八
事者有水可引之處固可因地勢以暢其流無水可引之處亦可藉人力以收其用此主創之道在興水
利又一也夫鄉曲細民終歲勤動農田所入究有幾何而額賦科征急于星火地方官受又復視同膜外
不能教養成全比年各省偏災官賑民捐動逾百萬兩飢寒疾苦顛連溝壑者仍不可計算皆由地方官
吏不能先事預防且水利與種植相因為用亦相濟而成嘉樹密林既能引泉致雨可免旱災根蟠土中
葉蓋地面當大雨時行高處泥沙不致隨流而下凡墾墾田故淤塞河流之患亦可減輕誠能以種植為
經以水利為緯以水利為體以種植為用行之十年而地利不日興民生不日富國計不日豐者未之有
也或猶以為迂天下安有更捷于是者否則雖有工作其如無物可製何雖有輪舟鐵路其如無貨可運
何此又各國通商以來濟變之良謀救時之要策而不可一日緩者也應請 皇上明發諭旨責成各省
督撫轉飭府廳州縣各官將種植水利兩端就 臣摺內所已言者因地制宜認真興辦所未言者亦實心
實力漸次擴充果其實政及民卓著成效隨陳事實送部引 見優予升階功茲稍次者酌量保獎其籍
端擾民奉行故事者立參撤仍請 飭下吏部戶部妥議考核章程通行各省三年大計將此二端歸人
考成庶幾積習頹風一時丕變貨不棄于地富可藏于民內是振興工作開闢商途出中華不涸之源易

外國無窮之利雖各省通商亦復何患之有是為生財大道本源中之本源也臣愚昧之見是否有當伏乞 皇上聖鑒訓示謹 奏

工部等部議覆華侍御講求務本至計以開利源摺

奏為遵 旨議奏事內閣抄出河南道監察御史華燁奏歲入不敷民貧財匱講求務本至計以開利源一摺光緒二十二年八月二十三日內閣奉 上諭御史華燁奏請講求種植水利以開利源一摺著該部議奏欽此據原奏內稱自各國通商以來小民生計日益艱難故勸農商講求物產為古聖王生財之大道即今日養民致富之真源也民力有所不足必須官為補助者可分為二大端一曰廣種植一曰興水利自兵燹以來各省樹木芟伐殆盡蔬果材木足以供生人之食用者具利視五穀為尤豐夫種植之大利其在南方者曰桑曰茶其蔽北方者曰葡萄曰棉花此四事者若果辦有成效力可行銷外洋自收權利此生財之道在廣種植者一也中國水利惟江南各省最為講求古今中外良法頗多約而舉之祇有八事引泉築塘開渠通潮開井蓄水用車填石斯八事者有水可引之處固可因地勢以暢其流無水可引之處亦可藉人力以收其用此生財之道在廣種植者又一也且水利之與種植相因為用亦相濟而成嘉樹密林既能引泉致雨可免旱災而根蟠土中葉蓋地面當大雨時行高處泥沙不致隨流而下凡壅壓田畝淤塞河流之患亦可減輕應請 皇上明發諭旨責成各省督撫轉飭府廳州縣各審將種植水利兩端因時制宜認真興辦等因臣等查廣種植興水利實裕 國切要之圖然必地方官平素講求認真經理方能漸收實效自兵燹以來舊河堙塞日多良法廢弛已久以致水患日亟水利不興兼之種藝之經日久不講地之腴者忽瘠民之富者忽貧現當庫款支絀之時正宜設法修復以開利

源該御史所陳自係目前當務之急惟各省風氣互異南北形勢不同因地制宜之方且等無從懸揣未敢奉行定議應請將該御史所奏各節抄錄通行各省將軍督撫等轉飭所屬體察情形奏明辦理總期廢無不舉利無不興庶於國計民生兩有裨益至如何勸懲之法應請旨飭下各省疆吏申明定章認真考查毋得視為具文於激揚鼓舞之中寓圖墮于豐之意所有臣等遵旨議奏緣由謹恭摺履陳伏乞皇上聖鑒訓示再此摺係工部主稿會同戶部辦理因往返片商是以具奏稍遲合併聲明謹奏

書鄂督開闢金楚利源示後

自古大有為之臣負經濟之才具卓越之見無不以厚民生利民用為本其所裁成輔相之道大抵準今酌古因時制宜以潤澤鴻業未有膠柱而鼓瑟者蓋其所挾持者大志趣甚遠非淺見寡聞者所能探其肩背也今鄂省張香濤制軍自任粵東疆寄其興利除弊已可概見惜未盡其用即量移鄂省去後士民思之如慈父母良以善政及人之淪次肌髓也今既督鄂於兩湖之地開辦鐵鍊事宜又置織布局棉炮廠利國用而厚民生無惑乎口碑之載道也夫民不自生必賴有以資其生者農桑而外大約不離乎開礦製造等事夫開礦與製造為致富之階其說起于泰西而泰西各國行之而獲效者比比皆是故其人皆極深研幾兩事並行不悖其國家又設格致書院以教育人才於製造之學既精益求精復建博物院聚五洲之產而比校之約期立會互相攷察大抵集思廣益樂取于人以為善而深戒夫私心自用之習蓋凡有是習而任事者有不憤者今香帥為富民開利源為貧民謀利藪簡員履勘本省鄰省煤鐵之礦勸諭開采善乎香帥之為民生國計也夫事不患不集而患識之不充功不患不成而患習之難去以香帥之量督兩湖方荷聖恩之簡畀事權在手無論何法皆可施行事豈尚有不集者乎然苟非具卓

識於先則且與庸碌同方謂多一事不如省一事之為妙也而香帥于蒞鄂之後即思有利必與紳民不
識其意多未浹洽香帥毅然為之而不顧蓋知後來獲效紳民必有恍然悟者顧或謂民情難與圖始以
鄂地輿情未洽當發軔之始方謂制軍事事更張有賴半山之執拗者於此而欲其集捐繫解趨事赴功
殊非易易不知香帥性成剛毅見義勇為其所改絃無非為民籌畫耳况公忠夙著昕夕焦勞久為中外
人之所欽仰其事有不速成者乎然而猶有說以處此夫謀天下大事者當定天下之大計蒙謂各省凡
有佳質之礦皆當勸諭開采設局製造使貧民得所衣食則中國之利源庶乎廣被不止斤斤為金楚計
也

利源

屢聞海關出入貨稅冊而知通商之事其害中國者至深而為害於北方數省者為尤大也每歲以出抵
入不足者三千萬金外洋食物所需照約免稅亦例不入冊近年洋酒一項華洋同嗜入口已千萬有奇
綜計一歲所虧實不下五千餘萬而海防之購船購礮者不與焉再閱十載即五萬萬金中國之財力幾
何能禁此無窮之罅漏乎東南十省腹地雖虛而橫覽海疆猶然庶富者出口之土貨畧可相當布帛通
行洋布之銷場不旺也天津一口洋貨之入者將三千萬土貨之出者僅二百萬不及十分之一烟臺一
口洋貨之入者六七百萬土貨之出者百餘萬不及五分之一惟營口一隅出產稍廣然油豆各物販售
蘇浙之間出洋者寥寥無幾直東草帽邊一葉固奸商攪雜銷路日微業駁羊毛不諳剪剔而洋布入口
年歲一年綜計已四千餘萬北方瘠苦有此絕大漏卮僻遠荒涼不知若何景况矣比年疊遭荒歉籌捐
濟賑仰給南方雖亦天災之流行未始非人事之釀劑也故今日外患內憂斯為最亟而興利之法亦莫

要於北方請以北土之所宜而外洋之需用者言之一日畜牧之利西人酷嗜牛乳為飲食所必需財以佳瓶貽諸遠道美國北方之民皆以殖草牧牛致富因筋蹄骨肉無一棄材也縣羊橐駝之毛按時收剪織為絨物華美溫和不惟四海通行即華人亦喜購用宜先提官款或集公司廣購園場以資牧放養牛取乳購機織絨物美價廉必可行銷外國矣一日葡萄之利葡萄一種本由西域而來北方寒而多沙植之無不善盛纍纍結實甘美殊常洋酒品味雖繁悉以葡萄為釀法國土產三萬萬獨以酒為大宗計數科徵收稅獨重泉甘味厚各國嗜焉然以西山秦岱之名泉較之彼猶瞠乎其後矣宜購地自種而仿西法以釀之即銷售中國海疆其利已逾千萬矣又况蠶桑之利考諸禹貢本皆青徐幽冀諸州而德州之棉花色白絲長頗頗洋產尚縲絲織布自收利權何至啼飢號寒重費九重之宵旰哉惟北省之民性樸而情不有以倡率而教導之則疲繭之風氣終難轉移流溢之金銀永無底止不歉而歉不荒而荒年復一年官歛民捐難乎為繼當財殫力盡之時將何以善其後也事有必至理有固然曲突徙薪宜早計矣

利權一

自來有天下者取諸民以制國用即量所入以治民事此古今不易之通義也孟子論取民之法準乎什一以為輕乎此與重乎此舉非堯舜之道蓋必如是而後用可足用足則事治事治則民治也後世幅員日廣道路之轉輸有費官吏之徵調有費往往取之甚輕而民之所供已至數倍況地之肥磽民之勤惰萬有不齊於是取民之制不得不務從其儉以恤民艱我朝承明代加賦之後悉除一切無名賦額厚澤深仁曠古未有通計一歲取諸民者惟江浙腴壤於什一為近此外由內地推之邊省又推之甌脫荒遠之區有數十而取一者有數百而取一者并有羈縻勿絕一無所取者蓋地曠民貧不得不薄賦以示

綏懷相承久矣然其當治之事當設之防或更倍於內地又不能以取之者微而置之不理故合計天下地丁正賦約二千餘萬兩僅足供綠營兵餉之用而其餘出款尚繁入款有限即令無偏災無大役猶且汲汲不遑迨稍值世變不得已而議開捐例議減俸銀議令州縣攤捐各款所得甚隘而其弊不可勝窮也所節甚微而其耗不可勝言也昔者粵逆構難一時名臣謀士創為權貨油釐之法誠以有寇不能不募兵有兵不能不籌餉自然之勢也明之晚季軍餉皆出於加賦一絲一粟必取之力田之農農之謀食也艱稍奪其事畜之資即已流亡失業所以流寇愈熾馴至事不可為若夫釐金悉取諸商商有餘資以營貿易莫不自顧身家且所抽之釐仍加諸所售之貨之價則於商並無所損而其利實取之眾人所以積少成多而民無大怨各省釐捐最旺之時通計歲收不下二千萬兩今亦有一千四五百萬兩所以能剿除羣寇懋威中興之業者職是故也夫明之貽誤與今之成功其得失較然明矣通者軍事漸平而經理釐務之人或失其初意不無病民之事於是論時務者莫不扼腕抵掌欲去釐金而洋人亦遂執洋人免釐之說以繼其後夫釐金果不便於民俟中國財用充足徐圖裁減可也外人而挽我自主之權不可也中國整飭釐金之弊嚴杜中飽俾商民樂業可也予洋人以壟斷之柄不可也何也洋貨既免釐必旋及於土貨洋商之運貨免釐必更攬庇華商之貨釐金之利豈不盡失耶且今軍事雖平而各路防營尚不可撤各省田賦尚未復額一切城廨倉獄善後之事尚未盡修莫不恃釐金為挹注苟或去之則拘拏貧弱百務俱廢異日彼乘我無備求減洋稅將何以應之耳且華商因避釐金之故競買稅單洋稅因

之稍往釐金既去則洋稅必多偷漏是洋稅隨釐金而減者又自然之勢也萬國公法有之曰凡欲廣其貿易增其年稅或致他國難以自立自主他國同其原權者可扼之以自護也又曰若於他國之主權征

稅人民內治有所妨害則不行令各國商情無厭之請欲有妨於中國其理之曲直不待言而明矣

利權二

凡兩國交涉之事條約所及者依約而行條約所不及者據理而斷中外各國所以敦睦誼於不敵也據舊約各貨納稅後即准由中國商人編運天下路過稅關不得加重稅則只可按估價則例每兩加稅不得過若干分此約立於道光二十二年繼時海內無事田賦足額較之地球各國有輕至三四倍七八倍者故於洋人立約如此耳厥後天下多故餉無所出始創為抽釐之法蓋西國通例釐出為入一歲中有額外用度輒加派於各項之中或有兵事亦由收捐集巨餉殆與中國抽釐名異實同而於例定之商稅則迥不相涉也夫中國有自主之權軍餉籌之中國非各國所能干預創辦釐金之初洋商之貨亦在各國口抽課均無異辭迨咸豐八年十一年訂亦條約與各口通共章程始議定洋貨土貨倘願一次納稅免各子口徵收紛煩每百兩征銀二兩五錢給予半稅單為他子口毫不另征之據其不領稅單者仍應遵關納稅遇卡抽釐斯乃格外通融之法體恤洋商已無微不至彼洋商運洋貨以子口半稅抵內地釐捐其獲利過於華商遠矣然而商人無厭之求靡所底止往歲滇案未結英國威使復徇奸商之請藉端要挾所欲甚奢日久相持始立烟台條約定於租界內不抽洋貨釐金又洋貨運入內地不分華商洋商流通洋貨者至矣盡矣後以加矣聞各國議院於中國釐金一事本不以為非戊寅八月新聞紙英之大臣以煙臺條約未遽核准並有慮中國責其食言者威使徘徊觀望其理既絀其氣自衰且彼之本計不過俟德法諸國修約之後坐享其成其或從中搖弄或隱為主謀均未可知然各國所據以爭者舊約之說也蓋舊細繹舊約之意當時既並無釐金則內地祇有常關耳常關稅額較輕於洋關其曰路過稅關

不得加重稅則者譬如江海關納稅復過蘇關浙江關納稅復過杭關均不再按值百抽五之例納稅耳然該關之稅仍自當完故後此議定不領稅單者有違關納稅之款而各商無不遵行至釐卡收捐專為籌餉而設名之曰捐則非稅可知名之曰卡則非關可知二者既不能相混則條約固無不得抽釐之文彼西人將何說之辭且查同治元二年間上海洋商屢請領事阻止租界抽釐英國卜公使批劉駁斥法美兩使亦意見相同已亥七月新聞紙錄字林新報有同治二年英使批上海英領事稟並美國外務大臣復英公使之語均言租界應有華官抽收華商之捐夫租界且如此況在租界之外舉是以折之而彼當無辭也洋人之貨一入華人之手聽其或留或售或用或不用洋人不得過而問焉則華人以名義所在自捐公家之餉亦固其所西洋諸國無物不征無人無事不征即如高費既稅之於合夥又稅之於出入貨物又稅之於發收銀錢又稅之於每歲所贏之利其徵歛之繁十倍中國設使中國欲減其稅項以便華物之暢行彼能允之乎舉是以折之而彼當無辭也洋人之說動謂以釐金之故致洋貨阻滯不行致近年進口洋貨每歲值銀至八千萬兩以外較之十數年前幾逾一倍可謂年盛一年矣而猶云貿易不暢其將誰欺舉是以折之而彼又當無辭也總之洋商於已得之利則習而忘之未得之利則變幻百出以圖之竟其無窮之慾壑雖盡去商稅猶未以為足也眾商日貼之領事領事日暖之公使公使非不知事之難行姑肆其惆悵以嘗試中國幸而得請可以要譽市恩萬一中國必不能允亦以有辭以謝眾商矣然則應之者在洞燭其情始終勿為所搖而已

利權三

聞嘗聞西人為持平之論者曰洋商之求免釐金非敢干中國之政特以中國釐卡林立收數互有異同

運貨者不能約定成本恐多折閱耳審如是則加洋稅免釐金之說也昔者日耳曼未一統之時小邦甚
布關稅煩苛百貨不能流通自普人稱雄始集各邦議立統關入口貨但征稅一次稅亦視前加重以各
邦幅員之大小按月均分近者德相畢士麻克又在其國議加進口稅令裁釐釐金之議德使已請德
王之若知中國必不能允彼或以統關之說進然中國之形勢與德國異中國之地以開方道里積算
於德國者幾及二十倍各省各口所設釐卡皆有必不可緩之用特以支銷令洋關加稅少中國萬不敷
用加稅多洋人又未必願也則惟有堅持舊章與之駁辯而已且中國所需之物祇有此數即去釐金貨
民不必因之多用洋貨其販運在數百里內者抽課本微即或道路轉運納釐較多獲利亦較厚其數較
加之售貨之內而華民亦不因此少用洋貨是釐金並無損於洋商也中國之獲商旅也陸路則有防勇
水路則有水師皆恃釐金以給巨餉去釐金必去水陸各營盜賊之起何以彈壓洋貨土貨皆將阻滯不
行是釐金大有益於洋商也夫無損如彼有益如此然而已使指威使之結釐起而相爭彼謂天下強國
志猶出英之上故凡英所不能行於中國者欲競而得之以示豪舉然竊以為誤矣已使於約章之原在
釐務之重要實未究心徒受威使之愚弄而不自知今以洋船貿易論英商居十之七美德法及東西洋
各國共居十之三就令爭而獲利亦不過英取其十而德取其一威使自知難可置喙乃唯已使於修約
之時強中國以所難行事成則英商坐享其利不成則德人且以不諧公法為笑于天下威使為英計則
得矣何英之智而德之愚耶德之君相素以豪傑成名一聞此中曲折亦必不以已使為然也或曰中國
加洋藥之稅罷洋貨之釐以相抵可乎曰抽釐則利權在我加稅則利權在彼即令倍加洋藥之稅與釐
金若足相抵然洋藥在中國例本當禁專恃此為利源名已不順萬一異日有可禁之機必以礙於釐項

而中止是使中國留中古之毒也且洋藥之為物輕微易藏在於把握若加稅過重偷漏必多仍無補於國計而釐金之利則一去不可返矣咸已諸使每舉關卡一二小節以為要挾最釐之辭不知此等乃通商常有之事就案清理則可藉為要挾之資則不可而況彼之所曉讀者又各有一是非也然則洋貨加稅之說可行乎曰必不得已如所加之數逮於釐金之數又於立約之時善防其弊則固未嘗不可行西洋各國稅額大較以值百取二十取四十為衡又多則有值百取六十者有值百取百者又有通行免關稅者蓋于軒輊之中各寓自私之計不若中國之大公無我出入一體今酌中定論自洋藥之外均以值百取二十為斷或於釐金之數稍足相倘乎

利權四

自巨寇竊發以來軍餉告匱始立權釐之法古之人有行者漢之算緡唐之除官錢宋之頭子錢意者若皆相同也救時之彥創為此策而軍餉賴以支持者逾二十年適者看寇削平洋人頗為軍事起則抽釐以助餉軍事定宜免釐以恤商不知此說似是而實非者也蓋自各國通商而洋貨之販運洋人之游汎尤益繁多不能無水陸各營以資保護不能無船政機器諸廠以精製造不能無江海各隘礮台以固天一方若此類雖質之洋人必皆謂當為之事而歲出之經費亦十倍於前日是故通商之事既不可廢國一項經費一日難減即各省釐課一日難停也夫中國於釐務持之甚堅洋人或出於加稅之一說萬一釐之數竟如中國所需之數則其中又有利有弊何也當子口稅章初定之時洋商以半稅而免內地無金其利本優於華商華商之巧者不免與洋商狼狽相倚講張為約于是代華商領半稅單而取其規費有用運照底送無運照之土貨有用洋船代洋商攜帶洋藥各貨有憑運照免納釐金未到子口之時

已將土貨銷售是洋稅與釐金均受其病也是使守分之華商不能獲利也是驅守分之華商不得不為奸商也今定稅例華商洋商一律凡進口之洋貨納稅於海濱之通商正口凡出口之土貨納稅於內地之第一子口各釐卡量加裁併論其大勢宜密於近海而疎於內地用新定稅額一征之後任其所之不復重征是舉前此弊端一舉而清之也不必立防弊章程而弊自絕矣內地各省只須於最要之口設立總卡既可樽節浮費而華貨販運較近者並無所征則小民感受其業此皆中國之利也然而猶有慮者釐金取之華民中國有自主之權今既盡歸洋稅設洋人於下次修約復以稅重為言勢必致固有之利勸動為洋人所牽制是宜於立約時聲明加稅與停釐相抵如異日酌減稅額亦宜酌復釐金以昭平允永杜洋人之藉口此一端也中國既權釐金所入盡歸洋稅其或華人自在內地販運土貨若免其征稅既恐洋商隱附於華商以滋弊混若偶經一卡而亦用值百抽二十之例勢必有所難是宜明訂章程核定道里之遠近如某處至海口須經幾卡則貨亦可作幾次分繳如是則華商不以苛斂為苦而其所經各卡節節稽查洋稅不能偷漏此又一端也二端既立乃可祛其弊而收其利矣然則中國既得其利洋商獨無利乎曰有洋商運貨入中國可豫定成本若干操券而來必如願而返利一也關稅交納之後運入內地無守候驗貨之煩無逐卡停留之苦行運既速成本較輕利二也洋商一次納稅雖若稍重然隱加之售價之內仍取償於華民華民但知洋貨之不復納稅也無不樂於販運或益從此暢銷利三也利之所在顯然易明洋人何憚而不為然竊料洋人昧于遠圖而溺於近利加稅一說勢固必不我從也則惟有堅持舊章與之駁辨而已

理財論

嘗觀經紀之家雞鳴而起算其利於財產之出入則左持籌而右握算以較其錙銖迄至歲之除際復核其總數若者為貸若者為財果也盈集也虧莫不表而出之以登簿籍使在事者罔不周知所以示大公昭信義也是商賈者流於財貨之出入尚能釐然各當有數目可稽而況國家之正用乎夫有國家者苟能勵精圖治近而各國之興衰遠而百年之隆替莫不互相考究以增長其識見雖國家之款項名目繁多一時無從細核然綱舉者目自張但集求其總數分別登明自可知其大略矣吾觀近日五大洲各國惟歐羅巴最為富強其出入之數亦最為明晰今即以英國言之查英國近來兼有五印度緬甸等處幅員之廣較之中國足可胡顏茲但攷其本國大概之數其款亦不為不鉅總計英國納地稅銀一千六百九十一兆磅房屋一千九百二十六兆磅莊家人五百二十一兆磅外事二十六兆磅國家息款五百二十七兆磅石石礦三兆磅鐵務三十兆磅鐵廠九兆磅煤氣廠一百二十五兆磅水廠六十五兆磅運河七十兆磅魚十二兆磅市水十一兆磅外有雜場六百九十五兆磅外國放債等一百九十七兆磅本國鐵道九百三十一兆磅外國鐵道七十六兆磅又百姓息款一百二十六兆磅外雜力二十八兆磅讀書與他貿易人五百四十一兆磅又補讀書與貿易人一百二十二兆磅以上共計七千餘兆磅皆係納稅之數目仍有不納稅者三百三十五兆磅在外國另有貿易人五百兆磅屋內傢具古玩寶物等件九百六十兆磅國家禁地五百兆磅以上共計二千餘兆磅皆係不納稅之數目二項統計一萬兆磅每年計生利共有五百五十四兆磅若照前合算每一人均分銀二百七十磅每一家均分銀一千三百五十磅總計地土六分之一凡承買地土前定本數目均以二十六年利息為准買房屋者定本數目均以十五年利息為准其餘利薄者定本則以三十年為准利極厚者定本則以四年為准以此觀之英國產業進

款為數甚鉅庫藏充實則甲於五洲雖有國債若以進款相較多至十三倍有奇此英國每年財賦數目大畧其餘泰西各國所有國計盈虧之數莫不曉然於大衆不獨本國之君臣上下可以共知之即凡各國之君臣上下亦無不共知之誠以國之財賦苟不早日結明非上下相欺開蒙蔽含混之習即內外相玩長因循泄瀉之風所以西瀛各國實事求是弊害不生所能富強日顯國勢日興蓋有故焉非偶故也中國當康熙乾隆間丁糧出入歲有常額考之典籍有案可稽故彼時海內殷富萬邦懾服可謂盛已迄至咸同軍興以後各營報銷有遲至數十年而未辦者各省奏銷之案每多逾限雖經諭旨嚴切憲文催促而因循延玩相率效尤者比比皆是即大部雖欲迅速清釐核其總數勢必有所不能為今日計惟有變通舊制祛除積習譬如商賈分立市肆先先慎選司帳之人另立新章嚴其出入覈其盈虧將見日計不足月計有餘而財貨於以豐盈基業於以鞏固矣今夫經國之道莫要於養民養民之道莫要於理財故古之治國用分掌於三府而統之以太府經之以太宰而九賦九式明晰秋毫誠重之也禮曰財用足而百志成所賴有經國之貴者勿漠置之也可

理財要義

理財有二義開源節流盡之矣今之廣製造興礦政以開源也紗布各廠成本之重不足敵洋產五金各礦收效之速不足濟急需今之併局卡裁冗費以節流也減併者百一無裨國計之大節裁者錙銖何當中飽之鉅言常用則歲出歲入不相抵言通商則輸出輸入不相抵言外債則竭內外之力而更無以相抵欲求足國先無病民欲收商利在稅外溢加稅之議事未就緒聞西人以釐金為詞蓋窺我國用之繼必不能停收釐金也應機決策莫若徑免天下中途釐金加關稅為值百抽十令彼無所藉口釐金既免

即仿行西國印稅之法辦理得宜計加修之關稅新收之印稅合之當倍於釐金而免釐則出口土貨易於流通加稅則進口洋貨或稍清減取益防損利在無形所謂足國而不病民且陰以挽外溢之利者此也西人舉一國之財為通商惠工之本綜其樞紐皆在銀行中國亟宜仿辦毋任洋人銀行專我大利中國既立使大信孚於商民泉府因通而不窮仿借國債可代洋債不受重息之挾制不吃鑄價之虧折所謂挽外溢以足國者此其一也墨西哥國以九成之銀鑄錢運行中國易我十成之銀歲耗以萬億計近來中外臣工多議自鑄銀元廣東湖北北洋南洋先後鑄造分兩輕重悉準皇銀臣愚以為國家圖法自古及今皆自為制鑄隨人趨步各國所無既不能廢兩為元各庫出入仍需元寶必致無銀可鑄查光緒十二年十月海軍衙門奏請將應放南北洋經費及東三省餉項均按二兩平核發是餉需改用京平已有成案今宜在京師特設銀元總局以廣東湖北天津上海為分局開鑄銀幣每元重京平九成銀一兩再酌鑄金錢及小銀錢使子母相權而行凡出款俱用官鑄銀幣各省關收納地丁錢糧鹽課關稅釐金俱收官鑄銀幣元寶小錠概不准用惟收款仍照庫平十成銀計算庫平較京平定以每百兩加平六兩十成銀較九成銀每百兩加色十兩除各庫上兌津貼銀一兩定以每百兩應加色九兩如應交庫平足銀一百兩者實收銀幣一百十五元無輕重高下之別無減平扣色之弊易簡理得端緒難欺每年度支八千餘萬兩戶部約可盈餘平色銀一千二百萬兩較向來各省撥解平餘多收當不下千萬所謂挽外溢以足國者又其一也此外商務鉅細萬端設施有序應請 特簡通達中外商務之大臣專司商政會同戶部取法鄰國實見施行興起商學鼓舞工藝利源無外溢藏富於商民君孰與不足國何患不强